

趙母黃太夫人行述序

窮通順蹇之道。或委之天意。或推之偶然。以予觀之。專賴天意者。恆怠。徒說偶然者。多妄。要在人之能歷艱困而創新境否耳。人固盡其才竭其力矣。則天自與之相周旋。應之若響。則謂之天意矣。不可蓋以有感斯應。未始非人之誠而邀天之福者也。寧有偶然之可言。人苟奮勉而天復不與。若姑有待者。則謂之天意亦無不可。其中必有理焉。亦無所容乎偶然也。獨彼懷稟天資。不肯竭盡乘時之勢。不能造因。至於窮困顛頓。一籌莫展。遂放弛委之天意。責之偶然。不自負責任於毫末。則人自取咎耳。天意偶然。皆奚繫焉。予讀趙母黃太夫人行述。靜審其懿行嘉言。乃知吾言之不謬也。趙母初奉佛教。虔事不輟。而歷經苦厄。未得脫離。以故疑其妄。改信耶穌。然爲基督徒後。亦屢遭艱難。頻遇試誘。而終不渝其初心。不以棄佛之道棄耶穌。蓋不以利奉教。而以義奉教矣。心有所感焉。信之堅而持之固。萬人莫得而撼之。此其創造新境之奠基也。相夫盡禮。教子有方。不苟私。不貪得。躬勞其事。至終不怠。故三子咸受教育。而膺牧師之重任。一女亦得不纏足而入學校。蓋心有所向。目標既定。朝斯夕斯。信不退轉。此其造境之所以輪奐俱美也。及夫瓜迭綿綿。子孫昌熾。益增十架之光輝。遂膺救主之寵錫。老懷綦慰。蔗境彌佳。人力未有不盡。天意因而愈彰。此則勢之所必然。在趙母固悉委之帝旨。而上帝則豈不因趙母之信道篤。乃光昌其行。

爲使繼述之人。有以循軌而直上也哉。嚮使趙母崇佛而棄之。奉耶而又棄之。猶豫無定。迷惘多端。惟利之圖。惟人是從。則趙氏安能叨天之惠。而其門楣宗族又甯有今日之繁且盛耶。備歷艱辛。所矢靡他。去破甑而不顧。望青雲而直上。親戚皆曰。此人心腸。橫於海盜。庸詎知如此決心之能超塵俗。越環境。而建創新業也耶。今趙氏昌矣。繼志之人。體會趙氏所以熾盛之由。而歸功於趙母。爲之刊行述。嗚呼。趙氏子孫。果能深識其先造因之心力安在。目光安在。從而推行其志於社會國家。則豈僅趙氏一族可以益就繁衍。卽社會國家。將無不受其利益也。西諺云。天助自助者。信然。予故以之序趙母之行述。蓋誌予有感於趙氏發展之所自。亦所以示彼怠且妄者。以人生窮通順蹇之由也。

主歷一千九百二十年六月終趙紫宸序於蘇州東吳學舍

麥序第二

諺云。瘦地開花晚。窮人發福遲。乍觀之似是天定之判語。細審之猶待人事之轉移。夫善場師之墾荒。穫非不晚也。而一經培壅灌溉。則晚穫者轉而早收。所謂人定勝天也。人貧猶地瘦。我父上帝爲最巧之善場師。得其墾厥心地。以眞理壅溉之。則晚果轉爲早實矣。吾嘗於眞信徒中體察之。往往不爽。閩南趙母黃太夫人者。其猶瘦地也歟。當其夫婦未得眞道之前。固貧且苦也。倘始終剛愎。不信眞理。吾恐不特發

福遲且將失發福之機。試稽與趙母同輩。而非信道者。其開花與發福。果何若乎。恐已失生機者。不知凡幾矣。而黃太夫人。幸天隔厥衷。幡然悔悟。決志皈依基督。雖所歷艱苦強忍。能爲人之所不能爲。能受人之不能受。備嘗藐視譏笑凌辱况味。處之泰然。惟堅守信德。以道爲樂。在人以爲不堪其憂。在彼以爲我父場師。以此試鍊。爲修治葡枝之妙法。其善體眞道至此。欲不結實纍纍者。其可得乎。其富於趙母者。鮮不謂其發福遲。而由今觀之。遲乎早乎。吾謂其早於他人萬萬倍。人第見其今日之發福。而不知其當日賴有我父善場師爲之轉移。彼人事未盡者。已入天演淘汰圈中。於不覺矣。然則當年之藐譏凌侮乎黃太夫人者。可憬然悟矣。今趙母一門三子。一婿二孫。爲教會著名牧師。其餘諸孫之爲教育家及別的藝業家。正未有艾。而葡枝蕃衍。已獲觀人口數十。家庭和樂。雍睦之象。敬虔昭事之忱。引人歸信之功。尤不能屈指計。式廓天國。貽耀宗邦。其源皆自趙母夫婦歸信始。我父場師竟壅灌瘦地。變爲膏腴。使開花結實。至永遠靡暨。非上主具絕大之權能。曷克臻此。苟與趙母及趙牧封溶昆仲同時者。見今之騰達榮顯。非不羨而慕之。曰。其眞發福矣。先開花於我矣。吾則願其臨淵羨魚。不如退而結網。果能領悟後來居上之旨趣。權黜卑舉之眞理。則天父有無量之福。備施諸起信之徒也。然此特世福耳。而天福更較此爲優也。黃太夫人爲許牧聲炎岳母。蒙示太夫人行述。命作序言。不敢藏拙。重違許君意。

用是書此。以識我天父爲善場師。實爲改移瘦地之良工。使覽是書者。有所觀感。而篤信眞宰之大恩焉。詩曰。予自幼而老。未見義者被遺。其裔丐食。觀此行述。可知斯言驗矣。民國八年雙十節。教末麥梅生沐手敬書於香江之後雨山房。

梁序第三

文字知己趙義民先生。郵傳其同道閩南趙母黃太夫人行述。問序於勳。勳拜讀之下。見其堅心信道。百折不回。求之鬚眉中已難。况巾幗乎。卒至享年六旬有七。登天堂而歸極樂。子孫蕃衍。後福無量。以視世之信道不篤者。何啻霄壤之判哉。勳雖未得交閩南趙牧師之喬梓昆仲。竊讀黃太夫人之行述。幸觀黃太夫人之遺像。未嘗不歎耶道之傳人者衆。感人者多。如閩南趙牧師全家佈道。信而有徵。爲不可幾及也。勳憶光緒十六年至二十五年。嘗移硯於福州南臺。十年中所交閩省之人文。以詩鐘介紹者爲多。其中不乏信徒。然無如閩南趙牧師其家也。若封濬君國忠君封波君之三牧師。皆黃太夫人之哲嗣。若恩助君及炳耀炳奎三君之牧師。傳道校長。皆黃太夫人之賢孫。至若金井許聲炎牧師。爲黃太夫人之快婿。趙靜閒女士。爲黃太夫人之愛女。許錫慧錫恩錫安三君。爲黃太夫人之外孫。綜計內外親戚。信道堅卓。傳道迢遙。有不可多覯者。勳歷觀孔子耶穌。皆以教民爲宗旨。周流列國。代有傳人。胥是道也。今黃太夫人全家信道。事績昭然。於行述見之矣。勳可無贊也。雖信教

自由。載在約法。然勳最樂義民之同道不孤。閩南之傳道有衆。而喜爲天下信徒道也。於是乎書。

中華民國八年雙拾節香山舉椀草堂主人梁國勳子膺甫拜序時年六十一歲旅次蕪湖廣肇公所旅蕪公學總教員室

賀序第四

惠安賀仲禹

峯高天姥。鰲極瞻百代之崇。星朗婺華。鵬霄矚千秋之燦。彼班張箴誠。徒博文名。鍾郝威儀。僅傳禮教。曷若道根深種。十架歸依。神菓長胎。三靈頂禮。因而熊丸銘帛。勗仲郢之雄材。封鮓汗青。成士行之偉烈。如趙母黃太夫人者也。夫蘇母以禮儀訓易簡。陳母以忠孝獎堯咨。景讓治軍。本萱庭於家法。承天勵學。循慈訓以身修。振古如斯。於今爲盛。緬彼雙丁二陸。聯袂作吾道干城。七薛三楊。登臺當天南領袖。化雨含榕山之氣。蒼生欽大冶之工夫。春風煦桐水之輝。羣秀慕荊州之丰采。筵佈傳經之席。棠棣能書。座敷說法之氈。壘篋迭奏。洵爲荊花競爽。抑亦萱草生成也。且也君號宣文。女稱博士。雪中柳絮。吟來謝氏之庭。掌上珠花。擊向韋娘之案。阿兄克肖。自有大家。傅母多才。定生黎哲。林風習習。旣蘭秀而芝榮。壻水溶溶。亦冰清而玉潤。因香成彩。映日有光。從壺內以論才。亦人間所罕有。自非賢母甄陶之力。寧得佳兒窈窕之資耶。况乎玉樹森森。悉爲樑棟。孫枝濯濯。盡屬琅玕。分來迦葉之珍。人稱偉器。飾

到羽儀之仗。世號清才。生賢兒克裕後昆。當嗣家聲於奕禩。紹箕裘以承祖武。爭標德教乎先芬。又非貽厥之謀。安著繩其之績也哉。迄今翠媯元扈。景仰芳徽。黃竹白雲。低徊懿範。正不第錦屏十幅。動孝子慈孫之思。且足令彤管三章。旌幽光潛德之行。故人拜靈光之殿。孰無感以興懷。而我輸元晏之才。終有慚於作序。

徐序第五

昔以士帖熱心事主。拯救全族。匪惟史冊增光。亦爲後代女徒所矜式。吾國今日處在危亡之際。正宜多此女徒。懇籲上主。示範家庭。以冀挽回天心而奮興教會。詎知主臨伊邇。僞善日多。所謂教會中聲勢赫濯之太太也。奶奶也。女士也。衣服則麗都矣。出入則乘輿矣。婢女則盈前矣。但求其足以爲上主之忠僕。家庭之模範者。殆不多覯。茲讀趙母黃太夫人行述。於其少年情況。事主原由。老年經歷等事。區分七章。無不詳敘。可見黃太夫人平日。實爲教會之明燈。鬼魔之勁敵。比之那太太奶奶女士諸輩。奚啻霄壤。噫嘻。玉體云亡。芳型宛在。吾教女徒。其亦知所取法焉。則幸焉。

民國八年秋

梧州徐劍魔謹識

李序第六

孟子有生於憂患之論。後之人盤根錯節。強自慰藉。謂蒼蒼者。將以生我。乃憂患者。百生者不獲什一。天道寧非無憑。今觀恭儉夫人。飽經憂患。而嗣續以昌。又將曰。是

果憂患生之也。噫其然。豈其然乎。松柏勾萌於巖穴。凌風霜。犯寒暑。幾經歲月。而後蔚成茂林。凡卉當之。枯死者不知凡幾。說者反以風霜寒暑。有以成松柏之堅。是後松柏之真。而反歸功於風霜寒暑。不大謬乎。

恭儉之生。以八齡弱質。童養於趙氏。慈姑見背。叔翁姑虐遇之。恭儉不怨。且以積年之孝敬。上格闔頑。嗚呼。此殆恭儉之真也。故其畢生。憂患迭更。處之泰然。卒能利用憂患之機。而成其堅忍卓絕。不屈不撓之精神。終於悟澈天人。皈依景宗。以極人世之安慰。而獲天國之尊榮。由是知人之全其真者。安樂固生。憂患亦生。非然者。安樂必死。憂患益速其死。非憂患能生人。憂患不能死人之真也。

真者何也。在孔曰性。在景曰靈。在天曰道。在人曰誠。恭儉以誠格親心。卽以誠悟天道。且以誠盡其性。而葆其靈。賜以天國之榮冕。非幸也。宜也。至若後嗣之繁昌。尤餘事耳。吾讀恭儉夫人傳。得悟生死之道矣。

中華民國八年重陽節前鉅鹿李逢謙敘於上海

楊序第七

上海趙義民先生。賜我趙母黃太夫人行述一冊。年捧讀之後。不勝欽佩。如黃太夫人。專誠事主。勤儉理家。嚴謹教子。甘心獻子。以任主役。可謂賢矣。令孫炳耀先生。爲

作行述。令媛靜閒女士。爲作拾遺。可謂孝矣。伏思年於戊午年爲先祖妣兩太宜人。刊竹柏雙清集。蒙海內同志。賜我詩文。不勝感激。蓋先祖妣勤儉理家。嚴謹教子。與黃太夫人同。所憾者。未能專誠事主。甘心獻子。以任主役耳。然年於丁巳年已棄邪歸正。爲監理公會信徒。尙德女校教習。惟知專誠事主。甘心獻身。蓋三年如一日也。其間雖遭婦病子喪諸事。而不改其初心。自問可以蓋先祖妣之愆矣。要之黃太夫人之德行。不獨爲子孫之師資。且可爲世人之標準也。是爲序。

民國八年九月下浣世再姪丹徒楊鴻年拜撰

馮序第八

蓋聞周文有后。德修而嗣續皆化於善。眉山有母。勤儉而夫子賴以成名。此已足爲女界之山斗矣。而况先盡人道。繼承天道。蒙難艱貞。力行不倦。豈非聖教信徒之好模範。家族社會之光榮者乎。炎得讀閩南

趙母黃太夫人行述一編。覽其遺照。知其梗概。穆然想見其爲人。其立身治家教育子女。待人接物。無不處之以誠。此人道也。其黜邪崇正。去僞歸真。小心翼翼。昭事上帝。亦無不矢之以誠。此天道也。中庸云。誠能動物。以黃太夫人一生至誠。其上邀天眷。垂裕後昆。非倖致也。西哲云。死而有其不死者存。惟靈魂與名譽是如。黃太夫人。可謂死而不死者也。炎愧不文。謹序數行。實未足以表揚懿德於萬一。亦

聊誌景仰之微忱云爾。

主一千九百十九年十月雙十節後十日後學馮炎公謹誌於梁發前廬

柴序第九

閩南許聲炎牧師。基督的忠僕。教會的健將。加以嗣續多而且賢。予心焉欽慕者久之。意謂天之報施於許君。何其獨厚。豈世澤綿遠。有所以感召之。懷疑不決者久矣。適趙君義民。持趙母黃太夫人行述。乞序於予。予始恍然許牧之得天獨厚者。內助賢能之力也。念吾始祖。亞當被黜樂園者。爲夏娃之受魔也。周文開拓王基者。姜姬之寬容也。是內助者。爲成敗的源流。况乎母氏遺傳。兒女秉賦。尤以母性爲篤。男子寄闔外專職。服務煩勞。原難分神。教導兒女。則許牧哲嗣賢能。歸功賢母。允稱確當。追溯賢母的由來。自當以趙母黃太夫人爲依歸。閱趙母行述。其艱苦備嘗。服從真理。恆忍卓絕。信仰基督的種種氣節。後之人。讀其書。憶其人。猶景仰。郤息於無窮。何况親受遺傳。親承庭訓者。則懿德令壺。永昭後世。其賢能爲何如耶。予生也晚。不克親炙趙母。則趙母之愛壻許聲炎者。予曾有一面之緣。欽慕其人。今序趙母的行述。溯厥由來。轉令人增無窮的景仰。釋許多的疑懷。憬然於栽培的天福。必待人事的潛修。始克以明邀天佑。爲足憑信焉。

民國九年九月九日信陽柴連復書於上海明道室

讀閩南趙恭儉夫人行述史詩十首

并序

五華鍾清源草

己己之秋。滬上神交趙義民君。郵寄趙母黃太夫人行述一冊。囑源賦詩以贊之。源展讀一遍。竊嘆夫人之行誼。誠有足爲後人法式者。則潛德幽光。代爲表暴。亦吾人之本分也。爰摘其犖犖數大綱。分譜俚句十章。以介紹於閱者。謂之詠史。則吾豈敢不過逢人說項。藉盡私忱耳。大雅君子。不知以爲然否。

一 總冒緣起

趙黃恭儉閩南岷。行述編傳藉識名。壺範撰刊欽不朽。玉容攝照羨猶生。騷壇景仰添詩話。女界稱揚起感情。我素逢人欣說項。願教遠近也葵傾。

二 棄假歸真

夫人原是過來人。溯厥前身屬暗神。事鬼服魔沿舊俗。奉仙佞佛陷迷津。洎聞真理驚沉夢。卽矢丹衷作聖民。三十年間如一日。敬虔靠主德精純。

三 忍讓處世

世遭橫逆必相仇。報復侵尋永不休。母遇至親頻作劇。身遭深毒總忘尤。線抽繭手多無吝。炭置讎頭好復修。主眷忠良援弱小。克全忍讓福盈眸。

四 勤儉治家

克勤克儉事耕鋤。後裔於今仰令譽。半世貧寒甘淡泊。畢生辛苦不歎戲。篝燈永夜

遲歸枕。易簣前朝尙採藟。托鉢提籃多預誚。詎知賢母竟安舒。

五 善教兒女

依依膝下喜成行。教育初基賴義方。戒鬪戒奢嚴不貸。防貪防竊密非常。男令習道殊駭俗。女送攻書更破荒。天足倡行兒感德。特標遺拾謝慈娘。

六 獻子傳道

哈拿割愛獻佳兒。賢母於今又效之。盡捨三男供聖職。更教半子作先知。但求天國興無滯。獨守家園苦不辭。遺囑歸真方訃報。免滋紛擾誤奔馳。

七 事主虔誠

自從信道甚虔誠。祈禱歌詩儼性成。聖日登堂無曠廢。常年捐款樂犧牲。不時經煉心尤篤。大限臨終志益貞。基督女徒千載下。請將遺範一相衡。

八 代牧祈禱

殷殷常代牧師祈。經訓煌煌有幾知。弗六章十九節牧亦是人同荏弱。師因盡職甚憂危。我當每禱求恩助。彼始臨機應變宜。賢母叮嚀恆注意。格言永古足昭垂。

九 蒙召考終

五福終稱曰考終。考終定謚品評公。夫人行誼吾無間。教會稱揚口盡同。功畢脫凡辭罪世。詔來衣錦入明宮。壽期六七雖云罄。自此長生永不窮。

十 後裔揚名

從來後果本前因。積善餘慶理最真。眼見桂蘭多拔萃。誼聯瓜葛亦超羣。孫爲作傳堪垂後。女亦能文克顯親。裔似星沙興未艾。創十三章十六節十五章五節愈將光大詠振振。

讀閩南趙母黃太夫人行述七律十首

并序

丹徒嚴青霽稿

竊維社會沈迷。破除不易。家庭專制。改革尤難。矧上有頑嚚。下處孤露。詎許時聞。構杙爲伍。壯夫當此。且視爲重瞳。劫厄號泣旻天。四面楚歌。侵臨絕地。而謂一委頓窮嫗。伶仃弱質。竟能蒙難艱貞。從容中道。爲救世之英雄。作軼羣之兒女哉。然而以予所聞。則閩南趙母黃太夫人。不惟大異乎是。而且有足多者。夫人量寬宏。性純篤。姑惡雖囂。女貞自若。觥觥歷史。久矣人無間言。裊裊餘音。甯俟予爲贅述。惟靈源由其濬成。墜業於焉恢復。四方風動。旣仰範而承模。五世雲礽。復呈頭而露角。嗚乎。得文母而周肇迹。才難不其然乎。留武名而趙代興。貽謀爲更遠矣。鉞東野鄙人。南濡下士。低土馬信主游移。押沙龍事親悖謬。乃今得緬賢母之遺徽。與女宗之淑德。洵欲聞風而起。重獨處之靈修。豈惟愛日以吟。擅平生之能事也。是爲序。

(一) 威儀棣棣仰山河。回首當年感慨多。煮豆燃箕煎太急。摘瓜連蒂痛如何。合居

世少張公藝。誠姪誰爲馬伏波。待脫家庭專制禍。可憐身世已蹉跎。

(二) 深閨迨屆及笄年。草草青廬合盞筵。墟里強分何氏宅。汶陽幸返魯公田。天雖

- 有漏媧彌補。石豈能言晉變遷。贏得彼蒼加福報。不虧忠厚在人前。
- (三) 勤儉由來善治家。而今砥礪益聲華。高堂底豫頑嚚改。戚里同情委婉誇。愛日較長因柳線。慈雲布暖到蘆花。從知繞指柔能化。全賴精純劍莫邪。
- (四) 自憐誕育半天殤。弄瓦無殊喜弄璋。脫粟終朝兒赤飽。織機竟夕女紅忙。雖聽天命安吾素。奈惑星言贅外黃。此日回看萊舞衆。不知遺憾可能忘。
- (五) 奉佛平生矢願堅。早疑救拔火中蓮。劇憐偈仄三弓地。難睹光明一線天。膜拜每經沙礫上。膝行常到戒壇前。那知醉飽僧嘲笑。不獨輸身更捨錢。
- (六) 真光忽地向南來。萱草靈芽脫禍胎。一旦桃源塵跡寄。半生蔗境老懷開。何當恭敬依桑梓。無那窮愁闕草萊。畢竟豪強人不悟。因風猶煽刮餘灰。
- (七) 一時梁孟並稱豪。作主精兵不欲逃。破陣直隨千將劍。傳家勝得呂虔刀。任憑世俗流言起。拚與強魔血戰鏖。畢竟凱旋心上地。郇城入衛擁麾旄。
- (八) 入山無恙探蹲鴟。忽遇神恩立召之。奉藥未勞三女粲。侍幃僅贖一孫枝。何憂何慮含飴去。全受全歸易簪時。行盡天程斯寢息。旁人茫昧那能知。
- (九) 朗耀天南幾德星。誰知概出自伶俜。精研主道頭先白。鑒別兒郎眼獨青。子舍靈源加引導。壻鄉人物亦甯馨。高風一曲傳箕穎。笑博巢由洗耳聽。
- (十) 亦嘗風木痛臯魚。忍見花間舊板輿。歌哭蓼莪詩廢後。釣游桑梓慨懷餘。不知

人世有奇行。况復頻年賦索居。今讀閩南賢母傳。一回拜倒一欷歔。

咏恭儉夫人行述詩十首

一 鉞嚴霽青題

恭儉黃夫人。適趙族。閩南農家婦也。中年皈主至虔。有子三。國忠。封濬。封波。皆名牧。女一。歸許牧。聲炎。亦教會柱石。夫人應召歸天之年。孫曾繞膝。又二十餘年。其孫炳耀。錄其行述。丹徒趙君義民。誼切同宗。力謀刊行。一時知名之士。爭爲序跋。備極哀榮。嚴子霽青。纂成十律。詠其事。綦詳。後世之人。感奮興起。其在斯乎。

(一) 平生怕讀豆箕詩。不幸名門早見之。羊祜酖人偏有意。馬援誠姪復無時。素心苦訴經蘭若。紅淚潛藏洒荔支。畢竟谿田遭報復。誰言臣叔不曾癡。

(二) 鹿車雙挽話于歸。爭及童烏賦式微。笈鳳囚鸞情太忍。嗔鶯叱燕事全非。解空貝葉梁王懺。寒徹蘆花閔子衣。弱肉由來強食慣。寧論噬瘦並吞肥。

(三) 姑惡聲中喚奈何。不如歸去掃烟蘿。家貧老屋分偏少。心廣良田種自多。哺幼日求饑鼠粟。織愁天賜化龍梭。謚稱恭儉猶謙德。忠厚開基歷不磨。

(四) 任羿豪強據有窮。少康一旅竟成功。半生質樸安儒素。五夜勤劬習女紅。回暖撥開煨芋火。爭春打斷落花風。石麟個個撐頭角。消滅塵緣佛說空。

(五) 寄生草變自由花。枉使風狂與雨斜。鎮日祇隨人作嫁。幼齡便學婦持家。稱心跳出珠如意。繞指柔成劍莫邪。擺脫塵羈兼俗縛。桃源深處話桑麻。

(六)從知異行著名流。豈必靈修始出頭。多士欽遲歌下里。於今食德服先疇。魯論半部欺人語。孟室三遷教子謀。笑煞庸夫情舐犢。兒孫呼馬更呼牛。

(七)愧無大筆記榮哀。且溯當年闢草萊。一樣頑嚙親祇豫。半生頂禮佛如來。孝思錫類都能格。末俗沈迷勢不回。那識早膺天眷厚。恩光直照到靈台。

(八)不隨雞犬侍劉安。不學金經寫小蠻。立地概將魔拒絕。登天詎畏道艱難。憂勞人勝鬢眉古。博愛仇當骨肉看。應得流芳千百世。森森階下出芝蘭。

(九)魂歸天上太匆匆。采芋歸來偶覺慵。幸早陳情留李密。頓驚棄養到茅容。蠶桑自了平生務。雞黍難如往日供。鼓腹含飴朝帝去。馳歸訣別枉乘龍。

(十)自憐家世本清貧。琴鶴蕭條羈海濱。華胄不妨稽宋遠。仁人尤幸得周親。回頭愛日俱賢達。洗耳高風到逸民。乞遍文章燕許筆。光芒萬丈樹貞珉。

趙序第十三

丹徒趙義民述

詳考新舊二約。六十六卷。吾徒視爲聖經的恩言。細究內容。多家譜的記載。創世記。亞當的家譜。出埃及。摩西的家譜。利未記。祭司的家譜。民數紀。猶太的家譜。甚至耶穌支派的家譜。記諸馬太。基督肉身的家譜。記於路加。此人所共知的實錄。馬可則起首於靈感。約翰則發端於太初。又何非家譜的形式。若是經其名。譜其實。又何議耶。國之本在家。家之本在身。吾身既歸宗教。家必隨之。吾華家族的制度未除。家乘

的纂述必備。設無家乘。是廢法律矣。是背宗親矣。是破習慣矣。是違人羣矣。人將指爲逃宗。蔑祖。負義。忘恩。不孝的罪人矣。則吾所信的教義。所抱的熱忱。何能宣傳於家族。何能宣佈於黨鄉。是纂修宗譜。貌循從人的義舉。隱布榮主的良機。顧不重歟。是以有創修信徒的家譜。底鼓吹。非孟浪耳。寓真誠焉。惜乎。吾道同魂。行修譜的偉業者。固渺。明修譜的關繫者。猶鮮。則提倡激勸的聲浪。又何能稍緩呢。昔救主對耶路撒冷痛哭。保羅對羅馬同宗傷心。乃曰。我有大憂。痛心不已。倘能救兄弟骨肉至親。卽自絕於基督。亦所甘心。羅馬九章二節至三節對同族佈道的責任。擔負最重。對同宗佈道的方法。書報最優。書報佈道於宗族同氣的中間。家譜最良。某公的嘉言懿行。是某支的若祖。若父也。某人的熱心毅力。是某派的若子。若孫也。某處的公益事業。是吾宗的某人所建設。某處的改良組合。是吾族某人所提倡。垂範宗族。光耀門庭。家乘流傳。鄉黨觀感。求潛移默化的實益。收上行下效的良模。惟家譜爲宜。此纂修家譜。所由而振作也。無奈吾華教徒。多係半途歸主。信仰幼稚。未及修譜的資格。經濟薄弱。未備修譜的資財。又修譜的一種阻力已。能具兩種的實力。屈指可數者。有王寵惠。王正廷等輩。庶幾可及。惜乎彼輩。受救主的恩寵。蒙先人的福蔭。獲教會的栽培。竟忘佈道修譜的天職。今閱趙母黃太夫人行述。附有五代系考。亦家譜的雛形了。修譜的首功。將於斯人實現之。是義民所主張的不誤。所希望的竟成咧。何幸如之。